

## Hofmann von Hofmannswalda, Christian: *Unum discamus mori* (1695)

1 Wenn wir die gantze welt in unsern kopff gefast/  
2 Des himmels lauff gesehn/ der erden ziel gemessen/  
3 Bey frühem morgen-licht/ und auch bey nacht gesessen/  
4 Und alles durchgesucht/ so kommt ein fremder gast/  
5 Weist uns das stunden-glaß/ und spricht: Mensch lerne sterben/  
6 Wo du nicht ewig wilst an leib und seel verderben.  
7 Ach wunder-volle kunst/ und unergründtes werck!  
8 Die weißheit/ so zuvor ein gantzes land geehret/  
9 Wird da zum kinder-spiel. Was Plato hat gelehret/  
10 Was Socrates gesagt/ und was der künste berg  
11 Von klugheit bey sich hat/ das wird allhier zum thoren.  
12 Wer nicht recht sterben lernt/ ist ewiglich verloren.  
13 Und weil ich denn gewiß/ daß iede stunde mich  
14 Aus diesem leben rufft/ daß tag und nacht bezeuget/  
15 Wienach der arme mensch zu seinem grabe steiget;  
16 So mach ich mich bereit/ und trachte brünstiglich  
17 In dieser höchsten kunst nur dieses zu begreiffen/  
18 Wie meine seele mög in todsgedancken reifen.

(Textopus: *Unum discamus mori*. Abgerufen am 23.01.2026 von <https://www.textopus.de/poems/20442>)